

MÀ BE

Ujesu a de le: Mà be hwaa le mi.
Matyuo 11 : 28.



SCRIPTURE GIFT MISSION
ECCLESTON STREET, LONDON SW1W 9LZ
Printed in Great Britain

Ki nyin Unim le bendigye indee-indee. Benyin be shi-e a kung 'iken unwaa-ma ke le he undi uyang-yang angwu a bong 'igyang-igyang ha ahe ù nim ye, ukpor ù kwu le likpan 'unyong angi lị ngyor igye kpamm. Jon 3 : 16.


Ujesu a ko bebwani le bè be hwaa le he. U de bendi-utung bema le: Mà tyang bebwani bè be hwaa le mi. Mà ndo abe ye likorye Unim a kung 'iteng-usu 'ima ke bendi abe bemen 'itaa i a. Luke 18 : 16.

Biwom abi be fee he 'ushia 'umen i puu bì yi le he Ubaabul (Bible) angwu ù yi igie Unim. Be kung biwom gbamm le he Ubaabul fee fe he ashia atyetye atyetye he igie Bette. Ki ngbebb le wò kwu le ashia amen i puu ha-a à bo angi likorye Unim a ke li Ubaabul he bendi puu bè ngye 'igyang gbe le ufe Unim.

ATYETYAN UJESU


Be hwan Ujesu

Be ma hwan Ujesu he lishi Ujudia angi bè ko le Ubetelehem he 'unyong ahwu Uherode a ma yi usu. Ki gbe 'igbe ye, bendi abe be bi lishi abe be ngye gbe le ikpen be ma bo le he 'igie he 'ipi libwee li be gye he Ujerusalem. Be ma le bii le: Unwaa angwu be hwan le ù kwu usu Ijuusi ù yi hung a? Li nde ukpen uma a fem le he 'igie he 'ipi



libwee li be. Fe na li be le li be fe-e.


Ukpen umen angwu be ma nde le he 'igie ashi libwee li be ana, a ma teng abe kpamm le wu he 'iteng 'imen ashi unwaa ù yi. Be ha gye he afee ushom, le nde unwaa le anam, Umeri. Be ma tim anung he itang fe unwaa anwuna. Be ngwee abwo he ibam ibell, ke-e beke bekaandi. Beke abe be ke-e bè yi 'inde ashi 'i ngbebb 'unung hwo puu ashi bè ko le "ugoldi" le inyim ikwan angi ì nung nyin angi bè ko le "ufrankisensi" le "umuru".



Be gbe gbe, itam i shi Ujosefu. He itam udengell Atyetyan Unim a be de-e le, ù bo 'inaa he-e ù kung unwaa le anam unwaa buu le be gye he 'ubong Igyepti le kwu ha kpamm u gbe de-e le bè tem le ha. Usu Uherode u fel ba kee unwaa ana he-e ù gwu-e. Ujosefu a kung wum le he 'unde, u bo 'inaa kung unwaa befe le anam unwaa nya le 'usu bo ndo he Igyepti. A ma kwu ha kpamm usu umen ana a hwo.

Nyong usu ana a hwo, itam i ha shi Ujosefu ha he Igyepti. He itam udengell Atyetyan Unim a be de-e le ù bo 'inaa he-e ù kung unwaa befe le anam unwaa tem gye he 'ipi be ma yi he Izwell. Abe be maa kee unwaa le he be bè gwu-e, be hwo ma. Ujosefu a wum le he 'unde, u bo 'inaa kung unwaa befe le anam unwaa tem gye he 'ubong bendi Izwell.

Matyuo 2 : 1-2, 9, 11, 13-15, 19-21.



He 'unyong ahwu Ujesu ù so 'isun

He 'unyong ahwu Ujesu a ma fel aze lihwo le ngi afee, atyam le anam be ma te le he gye 'ipam he Ujerusalem. Be ma mbee le 'ipam puu, be tem ligye, be gya he ushu, ukpor unwaa-bell, Ujesu, a ma ngyor kwu ha he Ujerusalem. Atyam le anam be ma ngye ye. He 'unyong ahwu be ma

nde-e ye, be ma tem gye he Ujerusalem le kee he.

He liti angi lekie be le nde-e he Ushom Unim utung ha bekaandi Ijuusi abe bè hwua bendi Iten. A maa gyo abe, ù yii bii abe bibibi. Bendi puu abe be ma gyo he, ki ma kwu abe he 'uhwo na a ngye 'iwom, u fan abe dell-dell.

A bii atyam le anam le: Ma yii shun mi le ana a? Ma ngye le 'i yi kpe-kpe le mì kwu he Ushom Atyagi ye a? Ashi a ma kong 'i ma nung abe ye.

Ujesu a bo gbe utung ha abe gye he Unazareti. A maa ka abe ife mbee 'unyong. Anam a ma kpe biwom abi a kong puu fe he lityam.

Ujesu a ma kaa le lishi abyele. A maa sha 'i nyin Unim or, bendigye or, le he ta ita ita.

Luke 2 : 42-43, 45-47, 49-52.

Ujon a wu Ujesu umbwo

Ujesu a kung gbe le he Unazareti he 'ubong Ugalili le hwaa le Ujon. Ujon a wu-e umbwo he umbwo ukaandi angwu bè ko le Ujodan.

Nya a na Ujesu a maa fem le he lishor be he igye, a nde lifung-atabe li yi hwuo. U nde Ukatia 'unyong Unim na 'alulu a be hwaa le he. A gyo Unim a kong le he lifung-atabe le:



Wò yi 'iken unwaa-gi a. Ki nyin mi
le wo indee-indee. Mak 1 : 9-11.

Usatan a maa gil he

Ukatia 'unyong Unim a shi Ujesu a
gbe ndo he libeb nya 'ukwo-ukwo. A
kwu ha he afee libeb ati asi afee. Inyia
libeb i ma yi ha. Usatan a maa gil he.
Ukpor idengell Unim i ma be kpell
he. Mak 1 : 12-13.




Biwom abi Ujesu a hwua bendi

Mà kong ha Unim 'itaa ashin: Atyetyan angwu ù yi he lifung-atabe, ipee ì kwu ke lizen ligang. Kusu 'ugang 'ù be. Biwom puu he igye i bì shi he ugim ugang nya a na abi he lifung-atabe bì shi. Ke li lizi angi lè zi 'unyin. Tyang biban bityan ke li na bel li tyang ke bendi abe be shi ban li. Tyang li lè mbu he igilale ye. Kpan li le he 'ibibi. Matyuo 6 : 9-13.

Kiwom ashi 'i fong amen mà bii, ma kpa ashi; mà kee, ma nda ashi; mà kem abwo he lishi, Unim u buu amen angi. Le bwo undi angwu a bii 'iwom, u be kpe shi; angwu a kee 'iwom, u nde shi; angwu a kem abwo he lishi, Unim u buu he angi.

Men betyam bebwaa, ayang he liwu limen ù nya kung 'ukor a ke unwaa-ma



he 'unyong ahwu a de le ù ke-e lizi?
Ayang ù nya kung ushii a ke unwaa-
ma he 'unyong ahwu a de-e le ù ke-e
ukwan? Men abe mà yi bendi bebibi
a or, ma ngye le ma ka bebwaa-men
biwom binunung teng teng le Atyamen
angwu he lifung-atabe a? Kì shi na
ana or u ba kung biwom binunung ka
bendi abe be bii he. Matyuo 7 : 7-11.

Mi, Unwaa Undigye, mi be he igye
anyin le mì kee abe be nim, mi kpan
abe a. Luke 19 : 10.

Biwom binunung abi Ujesu a shi

A kpe bebwani

Bendi besuso be be le bebwaa-bell le Ujesu ù tyua abe abwo. Bendi-utung Ujesu be ma shwan le be.

Ujesu a ma nde bendi-utung bema be shi ashin. Ki ma nyung he lityam. A kung de be le: Màm tyang bebwani be be hwaa le mi. Màm ndo abe ye likorye Unim a kung 'iteng-usu 'ima ke bendi abe bemen 'itaa i a. Mi kee le màm ngye le undi angwu a kpe Unim na usu nya a na unwani anwun ye, ù yi le abwo he 'usu ye.


Ujesu a ha kung bebwani wom he abee. U kung abwo pwom abe, ke be 'ukwun.

Mak 10 : 13-16.

A mbee unwan angwu u la hwo

Ki ma yi le ungikye angwu a ma yi ukaandi he Ukapaniyem. Unwaa-ma a ma yi gogo ye. A ma gyo le Ujesu a gbe le he Ujudia be he Ugalili. A le hwaa le he tim he anung de-e le ù gye he Ukapaniyem le mbee he unwaa angwu a kwun teng lityam lityam.

Ujesu a kung de-e le: Men, bendigye, ma ha ndo bong ha ami faa



le afaale ma nde bikwele-uhwo abi bi tyung ikeb Unim ye. Ungikye anwuna a de Ujesu le: Ukaandi, ha be utung ha ami teng unwaa-gi u hwa.

Ujesu a kung de-e le ù ndo gye. Unwaa-ma a mbee. Ungikye ana a bong igie angi Ujesu a kong, u gbe ligye.

A le fel he 'ukwo, iboyi ima i kpee le he. I de-e le unwaa-ma a mbee. A bii abe 'unyong ahwu a mbee. Be de-e le uhwuhwo le ishuhwuhwo nyong libwee li bel 'ubwo bel bel na a ma mbee.

Ungikye ana a well le he 'unyong 'umen ana na Ujesu a ma de-e le unwaa-ma a mbee. Ufe-gyang le bendi bema puu be ma bong ha Ujesu.

Jon 4 : 46-53.

A wum unwan le he lihwu

Ki ma yi le ungikye angwu a ma yi ukaandi a he ushom angwu Ijuusi ì kwu liwu. Be ko he le Ujaaresi. A be hwaa le Ujesu, be tim anung he itang, u tim Ujesu anung le ù ha gye ha ahe ushaale likorye unwaa-ma ungingye nya ken u la hwa. (Unwaa umen i ù yi aze lihwo le ngi afee.)

Be le wu ha he ushaale ukaandi umen i. Ujesu a bong le bendi bè te utung ha ahe he afee ushom yam-yam ye, a kee-kee bong le u ta le Ipita le Ujon le Ujemsi le atyam unwaa le anam a.

Bendi puu abe be ma yi ha be maa kya kung agelibe. Ujesu a de be le bè tem ki ye. Unwaa anwun a hwo ihwo ye, a mbu 'unde a. Befe puu be maa fel gwee he likorye be ngye dangg le a hwo ihwo.

Ujesu a gye le be he afee, a kung

'ubwo kwu-e he 'ubwo, de-e le:
Unwaa-gi, bo 'inaa. A wum he le he
lihwu, nya 'ukwo-ukwo a kung bo
'inaa. Ujesu a de be le bè ke unwaa
umen ana lizi. Luke 8 : 41-42, 51-55.

Atyetyan Ujesu a de le:

Men puu abe ma so bengbebb bè
ngbebb amen, mà be hwaa le mi, mà
mi kpell amen, mi shi 'i kwun amen he
'uhwo. Matyuo 11 : 28.

Bendi puu abe Atyagi a ke-m be ba
hwaa le mi. Undi angwu a be hwaa le
mi, mi ha ndo ndo he ye.

Jon 6 : 37.

Undi uyang-yang angwu a kee le u
pwom mi, ù zob 'uhwo-ma, u bong
lihwu pwom mi. Undi angwu a kee le
u pam 'uhwo-ma, ha a nim le 'uhwo-
ma. Undi angwu a bong lihwu he
'uhwo-gi, na ù be kwu le likpan.

Matyuo 16 : 24-25.